

MISAUN OBSERVASAUN ELEITORÁL UNIAUN EUROPEIA



ELEISOINS PREZIDENSÍÁL TIMOR-LESTE 2022

Komunikadu Imprensa husi MOE UE

Votasaun la'ó ho di'ak no kontajen lalais remata loron eleisaun ho administrasaun di'ak tebes

Dili, 20 Abril 2022

“Preparativu sira ba votasaun organizadu tebes husi parte autoridade eleitorál sira no loron eleisaun la'ó ho kalma no orden. Prezensa husi fiskál sira husi kandidatu ida-idak no observadór nasionál sira halo prosesu ne'e sai transparente. UE nia observadór sira avalia prosesu votasaun no kontajen nu'udar pozitivu,” deklara ohin dadeer Domènec Ruiz Devesa, Xefe Observadór MOE UE, durante konferénsia imprensa iha kapitál.

Xefe Observadór MOE UE subliña katak: “Eleisaun sira-ne'e kompetitivu, no kampaña hala'ó ho maneira pasífiku tebes, ne'ebé iha atake pesoál uituan iha rede sosiál iha loron ikus.” Ruiz Devesa destaka katak, “númeru husi feto sira ne'ebé partisipa iha eventu kampaña hanesan ki'ik no, maski iha aumentu husi feto nia partisipasaun ativu nu'udar oradór, asuntu empoderamentu feto hetan menus atensaun duké iha primeira ronda.”

“Durante segunda volta, emisora pública *Rádio-Televisão Timor-Leste* (RTTL TV) fornese kobertura editoriál ekuitativa ba kandidatu na'in-rua. Estasan privadu *Grupo Media Nacional* (GMN TV) kontinua favorese Ramos-Horta nia kandidatura. RTTL TV fornese kobertura notisioza uituan tan ba Lù-Olo, enkuantu GMN TV nia notisiáriu apresenta Ramos-Horta dala rua liután duke Lú-Olo.”

Ruiz Devesa esplika katak: “Misaun iha prezensa permanente iha país tomak hahú fulan Fevereiru nia laran no ninia konkluzau sira bazeia ba observasaun direta husi besik eventu kampaña 200 no liu entrevista hamutuk 1,000. Iha loron eleisaun, liu observadór UE na'in-40 relata liuhusi liu 160 estasaun votu iha munisípiu 12 no Rejiaun Administrativa Espesiál Oecusse-Ambeno.”

Deklarasaun preliminar Misaun Observasaun Eleitorál UE ida-ne'e entrega antes prosesu eleitorál tomak remata.

Sei hela etapa importante sira, inklui rezultadu finál no desizaun ba reklamasaun karik iha. MOE UE mantein nafatin iha país hodi observa prosesu eleitorál ne'ebé sei falta remata.

Ba informasaun tan: Ofisiál Imprensa: +67077153494, imprensa@eueom-timor-leste.eu